

समे – 12:25

<><><><><><>

JK LA Proceedings

मुख्यमंत्री उमर अब्दुल्ला होरें अज्ज आखेआ ऐ जे सरकार जम्मू कश्मीर च सैलसफा गी बढावा देने लेई वचनबद्ध ऐ ते एह्दे लेई केई गैंही पुट्टियां जा करदियां न। अज्ज विधानसभा च पुच्छे गेदे सुआलें दा परता दिंदे होई उमर अब्दुल्ला होरें आखेआ जे पिछले 2 बरें च जम्मू कश्मीर च 4 करोड़ 48 लख कोला मते सैलानी आए न जिंदे च 1 लख 20 जहार विदेशी सैलानी हे। उमर अब्दुल्ला होरें आखेआ जे जम्मू प्रांतै च बी सैलसफा दी बड़ी मती समर्थ मजूद ऐ ते श्री माता वैष्णो देवी जी दी यात्रा पर औने आले श्रद्धालुएं गी जेकर जम्मू प्रांतै दिएं होरने सैलानी थाहरें बख्खी आकर्षत कीता जा तां खित्ते दे सफलसफा च बड़ा मता उछाल आई सकदा ऐ। जम्मू कश्मीर विधानसभा दे बजट इजलास दा अज्ज दूआ ध्याड़ा ऐ। सुआल जोआब दे इलावा सदन दी कारवाई दरान अज्ज उपराज्यपाल मनोज सिन्हा हुंदे विधान सभा गी अभिभाषण पर धन्नबाद प्रस्ताह पर बैहस बी करोआई जानी ऐ।

<><><><><><>

BG-Tunnel

जम्मू कश्मीर च बन्ने कन्नै लगदे इलाकें च बेहतर सड़क राबता कायम करने दे जतनें दे हिस्से दे तौरा पर जम्मू-पुंछ जरनैली सड़क एनएच-144 पर भिम्बर गली सुरंग दे निर्माण कम्मै दी शुरूआत कीती गई ऐ। कल इस टनल दा शुरूआती ब्लास्ट कीता गेआ। भिम्बर गली सुरंग जेह्दी लम्बाई 1 किलोमीटर कोला मती होग, राजौरी दे कलाली कोला लेइयै पुंछ दे भाटा धूड़िया तोड़ी बनने आली 16 किलोमीटर परियोजना दा गै हिस्सा ऐ। सुरंग दे शुरूआत ब्लास्ट दे मौके पर प्रोजेक्ट संपर्क दे चीफ इंजीनियर ब्रिगेडियर नीरज मदान बी मजूद हे। इस टनल दे तैआर होई जाने कन्नै जरनैली ाड़कै दा रस्ता 10 किलोमीटर 200 मीटर घट्ट होई जाग जेह्दे नै इलाके च आओजाई, बपार गतिविधिएं ते सैलसफा च बाद्धा होग ते इलाके दी अर्थबवस्था गी मजबूती थ्हाग।

<><><><><><>

UN-Chief Remarks J&K

भारत नै संयुक्त राष्ट्र मानवाधिकार प्रमुख वोल्कर तुर्क हुंदे आस्सेआ अपनी सलाना समीक्षा अपडेट च जम्मू कश्मीर ते मणिपुर बारे कीती गेदी टिप्पणी गी सिरें थमां खारज करी दित्ता ऐ। जिनेवा च तुर्क हुंदे ब्यान पर प्रतिक्रिया दिंदे होई संयुक्त राष्ट्र च भारत दे स्थाई प्रतिनिधि अरिंदम बागची होरें, इनें गी बेबुनियाद करार दिंदे होई इंदी सख्त निंदेया कीती ते आखेआ जे जम्मू कश्मीर तेजिया कन्नै रमानदारी ते खुशहाली बक्खी उबड़ा बधै करदा ऐ, हालिया चुनाएं च लोकें बधी चढ़ियै हिस्सा लैता ऐ। सैलसफा उत्थें नमिएं उंचाइं गी छूआ करदी ऐ ते तेजिया कन्नै विकास होआ करदा ऐ। बागची होरें आखेआ जे तुर्क होरें अपने ब्यानै च छड़ा “कश्मीर” शब्द दा इस्तेमाल कीता ऐ जिसलै जे प्रदेश दा पूरा नां “जम्मू कश्मीर” ऐ। उनें संयुक्त राष्ट्र गी आखेआ जे ओ इक व्यापक ते संतुलित बचार आलारौह अपनाइयै कम्म करै। उनें आखेआ जे तुर्क होरें दुनिया च चलै करदे केई तनाजे दा जिक्र कीता जिंदे च यूक्रेन ते गजा बी शामिल हे, पर एहदे च पाकिस्तान दा कोई जिक्र नेई हा। उनें आखेआ जे इस अपडेट च तत्थें ते हालात दा मनमाने ढंगै नै इस्तेमाल कीता गेदा ऐ।

<><><><><><>

Mision Yuva Reasi

रियासी जिले च नोजवानें दे शक्तिकरण लेई उंदे लेई कम्म रोजगार दे नमें नमें मौके पैदा करने दे मकसद कन्नै कल जिला विकास कमीशनर निधि मलिक हुंदी अध्यक्षता च इक बैठक लग्गी। मिशन युवा तैहत दा मकसद नोजवानें गी अपना कम्म खोलने लेई सेहयोग ते समर्थन देना हा जेहदे च लौहके बपार विकास युनिटें ते बपार सैहयोग डेस्क दे प्रतिनिधि मजूद हे। बैठका च युवा दूत चुनने बारे सलाह सूत्र कीता गेआ जेहडे भलेया हेठली सतह पर नोजवानें गी प्रेरत करी सकन। युवा दूत नोजवानें गी हुनर विकास ते कम्म रोजगार दे मौके राएं मदद ते मार्गदर्शन करदे न।

<><><><><><>

Highway

जम्मू कश्मीर राष्ट्रीय जरनैली सड़के पर गडिडयां पूरी चाल्ली रमानदारी ते बवस्था आले ढंगै सिर चलै करदियां न। उआं यात्रिएं गी सलाह दित्ती गेदी ऐ जे ओह सड़कें पर बपनी बक्खी गै चलन तां जे सड़का पर रश जां जाम दी स्थिति पैदा नेई होए। रामबन कोला लेइयै बनिहाल तोड़ी जित्थें जे ल्हास पस्सियां पौने दी शैंका मती बनी दी रौहदी ऐ, उत्थें जाम

आली स्थिति नेइं बने। इस करियै सड़क नियमें दी पूरी संजीदगी कन्नै पालमा करने दी सलाह जारी कीती गेदी ऐ।

<><><><><><>

ICC-Trophy

आईसीसी ट्राफी दे पैहले सैमीफाइनल च अज्ज भारत दा मकाबला आस्ट्रेलिया कन्नै दुबई च होग। एह मैच भारतीय समें मताबक दपैहरी ढाई बजे शुरू होग। भारत सारे त्रै मैच जित्तियै ग्रुप-ए च अव्वल नंबरे पर ऐ। दूई मेठा न्यूजीलैंड ग्रुप-बी दे विजेता दक्खन अफ्रीका कन्नै दूआ सैमीफाइनल लाहोर च खेडोग। एह मैच कल होग। इस प्रतियोगिता दा फाइनल मैच ऐतवार गी खेड्डेआ जाग।

<><><><><><>

Annoncement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>